

Anis cekal raih ijazah sambil jaga ibu

KUALA LUMPUR. - "Biar-pun penat, saya rela beru-lang-alik menaiki motosikal sejauh 15 kilometer (km) dari kampus ke rumah di Putrajaya bagi mengelakkan emak terlantar sakit, kelaparan."

Demikian luahan Anis Ayuni Ismail, 22, yang terpaksa mengimbangi antara tugas dan kesibukan sebagai mahasiswa dengan tanggungjawab menjaga ibunya yang lumpuh seluruh anggota badan.

Siswazah Ijazah Sarjana Muda Sains (Sains Bioperubatan) di Universiti Putra Malaysia (UPM) itu berkata, ibunya Nik Mah Nik Kob, 62, menghidap penyakit angin ahmar sejak 10 tahun lalu.

"Kalau ada satu hingga dua jam 'jarak', saya akan balik ke rumah untuk beri emak makan kemudian pergi ke kelas semula. Setelah habis kelas pada waktu petang, saya akan bergegas pulang untuk mandikan emak dan beri emak



ANIS mencium ibunya, Nik Mah selepas berjaya menerima Ijazah Sarjana Muda Sains (Sains Bioperubatan) pada majlis Konvokesyen UPM Ke-40 di Serdang semalam.

makan.

"Emak boleh bercakap tetapi tidak jelas. Saya selalu kena pujuk dia kerana sejak sakit emak sensitif dan cepat menangis," katanya semalam.

Anak kelahiran Kelantan itu yang merupakan antara penerima ijazah pada majlis Konvokesyen UPM Ke-40 semalam melahirkan rasa

syukur kerana berjaya menamatkan pengajian dan mencapai keputusan cemerlang meskipun terpaksa mengharungi pelbagai rintangan.

Anis Ayuni semalam menerima Ijazah Sarjana Muda Sains (Sains Bioperubatan) yang disampaikan oleh Pro Canselor UPM Tan Sri Mohd.

Bakke Salleh pada majlis konvokesyen di Pusat Kebudayaan dan Kesenian Sultan Salahuddin Abdul Aziz Shah, UPM.

Anis merupakan antara 7,200 graduan yang menerima ijazah dengan kira-kira 500 graduan menerima doktor falsafah (PhD), 1,788 ijazah sarjana, 4,451 ijazah sarjana muda dan 461 diploma.

Meskipun anak ketujuh daripada lapan beradik itu berdepan cabaran hidup, dia bernasib baik kerana mendapat biasiswa daripada Jabatan Perkhidmatan Awam sepanjang tempoh pengajian.

Katanya, untuk rancangan masa hadapan, dia masih menunggu panggilan untuk mengikuti program Skim Latihan 1Malaysia dan berharap akan mendapat pekerjaan secepat mungkin. - Bernama